

հայոց համար մի հիւրատուն: Իսկ Հայաստանում էլ հայ մարդկանց ձեռքով կաթողիկոսութիւն քարոզելու նպատակով՝ սկսեցին հայ մանուկներ ընդունել «Տոնակաւոր» փրօփականդայի դպրոցը, որը կաթողիկոսութեան մի օջախ հանդիսացաւ իր ամբողջ գոյութեան ընթացքում (Չամչեան՝ «Հայ. Պատմ.», Գ. 520):

Բայց շմոռանանք փակագծի մէջ իսկոյն աւելացնել, որ եթէ Արզար դպրի քաղաքական առաքելութիւնը անյաջող անցաւ, սակայն նրա Եւրոպա ընկնելը մեծ օգուտ բերեց հայ տպագրութեան գործին: Արզարը առաջին հայ տպարանը հիմնեց Վենետիկում (1565 թ.) եւ տպագրեց մի շարք գրքեր: Հետագայում այդ տպարանը փոխադրուեց Պոլիս եւ շատ արդիւնաւէտ գործունէութիւն ունեցաւ:

4.

Այդքան դառն փորձերից յետոյ՝ հայ քաղաքական մտածողութիւնը այնուամենայնիւ չի յուսահատուում եւ չի հրաժարուում Հայաստանի անկախութեան գաղափարից:

Եւ մենք կրկին տեսնում ենք, որ Ստեփաննոս Սալմաստեցու փորձերից մի դար յետոյ նոյնը կրկնում է ժամանակի կաթողիկոսը, Յակովբ Գ. Զուղայեցին (1655-1680) — նոյն նպատակով եւ նոյն ճանապարհով:

Դա մի կողմից ասացուցանում է, թէ ուրեմն ո՞րքան վատթար էր հայ ժողովրդի վիճակը մահմեդական տիրապետութեան ներքոյ. իսկ միւս կողմից՝ որ այդ գրութիւնից ազատուելու համար հայ ժողովուրդն եկել էր այն անխախտ համոզման, որ միայն մէկ ճանապարհ կայ — Հայաստանի Անկախութիւնը:

1678-ի ամառը Զուղայեցին մէկ գաղտնի ժողով է գումարում Էջմիածնում, որին մասնակցում էին, բացի իրենից, 12 հոգի — վեց արքեպիսկոպոս եւ վեց աշխարհական մելիքներ ու իշխաններ Հայաստանի զանազան կողմերից:

Ժողովն ընտրում է վեց հոգուց մի պատգամաւորութիւն — երեքը՝ հոգեւորական, երեքը՝ աշխարհական — որը կաթողիկոսի գլխաւորութեամբ պիտի անցնէր Եւրոպա՝ Հայաստանի ազատութիւնը ինդրելու: Պատգամաւորութեան մէջ էր նաեւ Իսրայէլ Օրին, իր

հօր փոխարէն: Որոշուած էր՝ հարկ եղած դէպքում մի քանի գիշումներ էլ անել կաթողիկոսութեան, եթէ դա պահանջուէր:

Աննկարագրելի նեղութիւններից յետոյ՝ յաջորդ տարուան ձմեռը պատգամաւորութիւնը հասնում է Պոլիս: Բայց աւելի առաջ գնալ չի կարողանում մի շարք պատճառներով, որոնց քննութեան մէջ չենք մտնում: Զատամեալ Հայրապետը մեռնում է (1680 թ.) յլստից խորտակուած եւ պատգամաւորութիւնը ձեռնունայն վերադառնում է հայրենիք: Միայն Իսրայէլ Օրին շարունակում է իր ճանապարհը, հասնում է Եւրոպա, ուր գիտութիւն ու փորձառութիւն ձեռք բերելով, պատրաստուում է իր ասպագայ քաղաքական գործունէութեան համար:

Զուղայեցուց յետոյ, Եղիազար կաթողիկոսի օրով, հայ իշխաններն ու մելիքները նորից ժողովի են հաւաքում Էջմիածնում, նորից ընտրում են մի պատգամաւորութիւն, որը պիտի գնար Եւրոպական արքունիքների դռները նորից բախելու: Պատգամաւորութիւնը այս անգամ էլ հասնում է մինչեւ Կարին եւ աւելի առաջ գնալ չի կարողանում «անհաւատների պատճառով», “a cause des infideles” — ասում է փաստաթուղթը):

Այնուհետեւ հայ քաղաքական մտքի ղեկավարութիւնը իր ձեռքն է առնում Իսրայէլ Օրին: Սկզբում նա՝ էլ գնում է ճիշդ նոյն ճանապարհով, որով ընթացել էին իր նախորդները: Նա՝ եւս Հայաստանի ազատութիւնը փորձում է գտնել Եւրոպական արքունիքներում:

Սիսիանի Անդեղաղիթ աւանի ժողովում (19 Ապրիլ, 1699) թ. հայ մելիքներն ու իշխանները, Օրիի առաջարկութեամբ, որոշում են դիմել Եւրոպական պետութիւններին, գլխաւորապէս Պապին, Գերմանիայի կայսրին եւ Պֆալցի կայսրընտիր Եոհան Վիլհելմին: Վերջինս անձնական մօտիկ ծանօթութիւններ ունէր Օրիի հետ եւ շատ մեծ ազդեցութիւն Գերմանիայում ու ամբողջ Եւրոպայում:

Ընդհանրապէս Օրին եւ իր գործակիցները

1) Եզեանց, «Պետրոս Մեծի յարաբերութիւնները հայ ժողովուրդի հետ», փաստ. թիւ 2: